

See Leng sumbang \$1j sokong wanita kejar kerjaya Stem

WANITA yang menceburi kerjaya bidang Stem (Sains, Teknologi, Kejuruteraan dan Matematik) bakal dibantu dengan sumbangan dana \$1 juta daripada Menteri Tenaga Manusia, Encik Tan See Leng.

Katanya, dana tersebut tercetus berdasarkan pengalamannya mengenali dan bekerjasama dengan ramai wanita berbakat dan berkebolehan dalam bidang seperti perubatan, farmasi dan kejuruteraan kimia.

Beliau berkata demikian semasa mengumumkan sumbangan peribadinya itu di Universiti Teknologi Nanyang (NTU) semalam.

“Semasa saya membesar, saya diberi peluang diajar oleh ramai guru wanita yang memberikan inspirasi dan sebagai pelajar perubatan, terus dibimbing oleh beberapa minda terbaik yang juga pakar klinisian wanita,” kata Dr Tan, yang mempunyai lebih 30 tahun pengalaman dalam sektor penjagaan kesihatan.

Beliau telah melancarkan dana tersebut bagi menyokong wanita dalam kerjaya Stem semasa forum memperingati ulang tahun pertama program Galakan Wanita dalam Kejuruteraan, Penyelidikan dan Sains (Tenaga), yang bertujuan merapatkan jurang antara lelaki dengan wanita dalam bidang ini.

Dinamakan sempena mendiang bapanya, Tan Seow Chiap, dana tersebut akan menyokong biasiswa hingga \$50,000 setiap tahun bagi wanita yang ingin menjalani kursus Stem di NTU.

Ia juga akan membantu membiayai program bimbingan tahunan oleh pakar Stem bagi mahasiswi dan program inkubasi yang akan memberikan geran \$1,000.

Menurutnya, beberapa rakan kerjanya bertanya mengapa dana tersebut dinamakan sempena mendiang bapanya dan bukan ibunya.

Katanya, kesaksamaan jantina bukan isu wanita.



SUMBANGAN PERIBADI: Dr Tan mahu menyokong lebih ramai kaum wanita mendalami kerjaya Stem.

“Untuk membentuk Singapura menjadi masyarakat yang benar-benar adil dan inklusif, kami perlukan usaha seluruh masyarakat untuk mengalihkan pemikiran tentang peranan jantina, menolak sikap berat sebelah dan memecahkan halangan yang menghadkan potensi wanita dan sumbangan mereka,” katanya.

Berucap di forum tersebut berkaitan cabaran dan huraian bagi merapatkan jurang antara lelaki dengan wanita dalam bidang Stem, Dr Tan berkata hasratnya untuk menghentikan diskriminasi dalam mana-mana bentuk, khususnya terhadap wanita, dipupuk oleh ibunya.

Katanya: “Beliau menghidap penyakit kronik dan meskipun demikian, saya rasa dengan ketabahan yang tinggi beliau terus bekerja sambil untuk cuba menyara keluarga.

“Saya rasa ini juga dipandu oleh kecekalannya dan juga azam saya untuk cuba melihat bagaimana kita boleh menyamakan kedudukan bagi semua.”